

Ebbaluṅa eyohubiri eyi Pawulo gaṅandiihira Abakoriiso Enyanjula

Pawulo omuhwenda wa Yesu nj'owanandiiha ebbaluṅa eya *Bakoriiso eyohubiri*. Bateberesa baati gayiṅandiiha ṅagati w'ataanu n'etaanu n'ataanu namukaaga oluvanyuma lw'ohusaaliwa hwa Kurisito. Yino nj'ebbaluṅa eyohubiri eyi Pawulo gaṅandiihira Abafugiirira Kurisito abomu hibuga Koriiso. Naṅuma ebbaluṅa eyi alomaho mu 2:3-4. Abahugu mu by'Ebbayibbuli bateberesa baati Pawulo gayiṅandiihira mu twale ly'e Makedoniya (2:13).

Ebbaluṅa yino y'enjabulo hu ndaayi olwohuba Pawulo gaali musangaafu olw'ohunulira eripoota endani ohunwa eyiri Tito ni yinamba hu bafugiirira Kurisito ab'e Koriiso. Ebbaluṅa yino, yisomesa hu hugaba ng'olu hiri mu Ndagaano Epyaha (8-9). Hiboneha oti abasomesa ab'obudulingi baali batambisa abaatu ab'esambo embi mu hibubbu hy'abafugiirira Kurisito ehyo olw'ohwenda ohunaha Pawulo esiro. Ehyo hyamuleetera ohuloma hu bubonero ow'omuhwenda wa Yesu Kurisito.

Ebiri mu bbaluṅa yino mu buupi

1. Pawulo aheesa abafugiirira Kurisito (1:1-7)
2. Pawulo acuusa etegeha yiye (1:8-7:16)

3. Ohusoloosa obuyeedi ow'abafugiirira Kurisito ab'e Yerusaalemu (8:1-9:15)
4. Pawulo geromereraho ng'omuhwenda wa Yesu (10:1-13:10)

¹ Ndiise Pawulo, owafuuha omuhwenda wa Yesu Kurisito, olw'ohusiima hwa Hatonda ni ndi n'omulebe Temuseewo, hubanjandiihira enywe ehubbubu hy'abafugiirira Kurisito mu hibuga Koriiso, ni naabo bosibosi abali hiisi njaatu mu twale ly'Akaya.

² Hatonda seefe ni Musengwa Yesu Kurisito, babanjambire ehisasabirisi era babanje emiyaaya.

Pawulo ajumirya Hatonda

³ Hujumirye Hatonda era Semwana ya Musengwa weefe Yesu Kurisito, Seefe oyo ow'ehisa era Hatonda agumya abaatu.

⁴ Oyo nj'atugumya ni huli mu bigosi ebya hiisi ngeri, hwesi ko kwasobola ohugumya abo ababa ni bali mu bigosi.

⁵ Hiri hiityo olwohuba eyi huhomya ohubonaabona ng'olu Kurisito gabonaabona, peyi Hatonda ahomya ohutugumya n'abita mu Kurisito.

⁶ Ohubonaabona hwefe hwahubaleetera ndinywe ohuba bagumu mu hufugiirira era ehyo hibanjweramo ohunonjoha. Hatonda n'atugumya, mwesi hibanja obugumu mwanjanga ohugumira ebigosi ng'olu efe hubigumira.

⁷ Olw'ehyo, hubalimo esuubi ery'amaani era humanyire huuti muja hugumira ebigosi hyefe,

olwohuba mwesi Hatonda aja hubagumya ng'olu atugumya efe.

⁸ Aboluganda, hwahendire mumanye ohubonaabona ohuhwabitamo ni huli mu twale ly'Asiya. Batugudya ehibitiriye era hwanjwamo n'esuubi eryohuba abalamu.

⁹ Mu butuufu hyali oti hani batusaliye ogw'ohufa. Era ehyo hyatusomesa ohutesiga amaani geefe aye ohwesiga Hatonda yenene alamusa abafu.

¹⁰ Hatonda owatunonia ehigosi hyehyo, husubira huuti aja hweyongera ohutunonianga ebindi. Era esuubi ly'efe liri mu mwene oyo.

¹¹ Olw'ehyo, hubasunga mutusabire era olw'esaala j'abaatu abangi Hatonda alituna ekabi hyahena hyaleetera abaatu bangi ohumweyaasa hu lwefe.

Pawulo acuusa mu tegeha yiye

¹² Aboluganda, ehituleetera ohwepaaha hiri ti mu myoyo jeefe hunulira huuti enebisya yeefe mu baatu n'ohuhirira erala mu kolagana yeefe ni nenywe, hubaaye b'amazima eyi muli olw'amaani ga Hatonda.

¹³ Era sihunanga hubanjandiihira ehiitu ehimutananga ohusoma mwategeera. Era suubira ti

¹⁴ wayire simututegeera bulaji, ehiseera hiryola mwatutegeerera erala bulaji, ehyo hibaleetere ohutwenyumirisamo ng'olu hwesi hulibenyumirihisamo hu ludaalo olu Yesu Musengwa aligobola ohusala emisango.

¹⁵ Era olwohuba nahitegeera, nategeha ohu-sookera eyo ko mwahaganyulwamo habiri.

16 Nategeha ohubahyalira ni tiina e Make-doniya era mu hugobola nindi mbaboneho mupeho obuyeedi ni tiina e Buyudaaya.

17 Olwo, olw’ohusalamo olugendo olwo, n̄aahani mujeega muuti sinoheresa ehi mba ni ndomire? Era mujeega muuti ekola yange yitiinira hu y’abaatu abatafugiirira Kurisito abaloma baati, “Naahole,” aye n̄abitano ahaseera hatotono nga baloma baati, “Sinaahole?”

18 Aye ng’olu Hatonda ali w’amazima, obuhwenda weefe eyi muli bubulamo hwefudula.

19 Hiri hiityo olwohuba Yesu Kurisito, Omwana wa Hatonda oyu ese ni Silaasi ni Temuseewo hwabalomera ebimuṅambaho, sigefudula. Aye niye hiisi ehi aloma, ahiroma n’omwoyo mulala.

20 Hiisi ehi Hatonda gasuubisa, Kurisito gahyoheresa. Era hwesi mu huṅa Hatonda enono nga hutaaho enjihiso huuti, “Amiina,” ni hubita mu Kurisito omwene oyo.

21 Hatonda nj’agima efe ni nenywe hwemerera n’amagulu abiri mu hufugiirira Kurisito. Era Hatonda gatujuhaho amafuta,

22 gatutaaho ahabonero ohulaga ati huli babe era gatuṅa Omwoyo wuwe ng’omusingo ohulaga ati alituṅa ehi gasuubisa.

23 Mu moni ja Hatonda ehi mbaloma nj’amazima ti ehyagima ndiniija eyo e Koriiso, hyali hyahubasaasira mutalumwa myoyo ni mbanenya.

24 Sinenda efe hube ndiife ohubalomera engeri eyi muli n’ohufugiiriramo Kurisito aye huholera

ŋalala ni nenywe ko mube basangaafu era muŋangale mu hufugiirira hwenywe.

2

¹ Kale nasalaŋo ohutagobola eyo, olwohuba ohuuja hwange hwahabanweryemo ohubanakujasa nindi.

² Hiri hiityo olwohuba singa mba ndiise abanakujasa, nj'ani aja husangaasa ohutusaho enywe aba mba ni nakujahiise?

³ Ehyo c'ehyagima nabanandiihira, ni tenda niije eyo mbanakujase ate nga muli n'ohusangaasa. Nehahasa ti ehisangaasa, hibasangaasa ni nenywe mwesi.

⁴ Ni nabanandiihira ebbaluŋa eyo naali n'enaku hu mwoyo era n'amasiga ni gan-jituluha. Ehigendererwa hy'ohubanandiihira sihyali hubanakujasa aye nendire hubalaga ng'olu mbenda bugali.

Ohusonija owabbenga

⁵ Hanye ŋaliŋo owasobya hu wahye ga-baleetera ohunakujala, sigasinga hunakujasa ndiise aye gasinga hunakujasa ninywe mwes-imwesi.

⁶ Ehibonereso ehi bangi hu enywe mwamuŋa, himuhena.

⁷ Naahani mumusonije era mumugumye, ko enaku etamuŋamba gahanda gaŋwamo amaani mu hufugiirira.

⁸ Mbasunga mumulage muuti muhimwenda.

⁹ Era ehigendererwa hy'ohubanandiihira, nendire hubona oba mugondera hiisi ehi mbaloma.

¹⁰ Munasoniṅa omuutu yesiyesi, keesi musoniṅa. Ni ṅaba ni ṅaliṅo ehy'ohumusoniṅa, hu lwenywe nahena ohumusoniṅa era mu hino Kurisito nj'omujulizi wange. ṅanabaṅo oyu mba ni soniṅire, mba musoniṅire.

¹¹ Ehyo kihola olw'ohutenda Sitaani hutuhema olwohuba humanyire ebigerenderwa bibye.

Pawulo e Turoowa

¹² Ni natiina e Turoowa ohulomera abaatu Amaṅuliro Amalaṅi agaṅamba hu Kurisito, Musengwa gaali ganjiguliyeeṅo engira ohubuulirayo.

¹³ Aye mu mwoyo gwange sihyambisya bulani ohutagaanayo ow'oluganda Tito. Era ehyo hyagima nabaseebula n'atiina e Makedoniya.

Mu Kurisito huṅangula

¹⁴ Cooka hweyaasa Hatonda atuleetera ohuṅangula habuhyabuhya hulwa Kurisito era atatambisa ohusasaania Amaṅuliro Amalaṅi agaṅamba hu Kurisito agali hy'amaṅfuta agahaloosa hwagoosa hu hiisi muutu.

¹⁵ Hiri hiityo olwohuba huli hy'olusyololo oluṅunya obulani ohuṅwa mu ṅongo eyi Kurisito aṅonga eyiri Hatonda ni ṅunyira abo abanoṅoha ko ni naabo abali hutina mu husihiiriha.

¹⁶ Eyiri abo abaatiina mu husihiiriha, huṅunya hy'olumbe aye eyiri abo abanoṅoha huli hy'ahasyololo ahalaṅi ahaleeta obulamu. Olwo ṅaahani nj'ani amwegerageraniaho ohuhola omulimo hy'ogwo?

17 Efe sihuli hy'abaatu abandi abatambisa ehibono hya Hatonda mu ngeri ecaamu olw'ohwenda ohusuna obuṅinda. Aye efe mu Kurisito huloma amazima olwohuba Hatonda nj'owatutuma.

3

Abajeeresa ab'endagaano ya Hatonda epyaha

1 Olwo hunaloma huutyo, huba huli hwepaaha? Oba hwesi hwenda ebbaluṅa ejitulomaho ebiraṅi eyi muli oba ohuṅwa eyi muli hy'abaatu abandi?

2 Hiri hiityo olwohuba enywe mwabeene muli hy'ebbaluṅa etusemba eyi baṅandiiha hu myoyo jeefe eyi hiisi muutu amanyire era eyi aṅanga ohusoma.

3 Hiisi muutu abona engeri eyi mufugiiriramo Kurisito, ahahasa ati muli Bbaluṅa. Ebbaluṅa eyibatanandiiha ni wiino aye n'Omwoyo wa Hatonda Omwene Bulamu. Etaṅandiihiwa hu bipande by'amabaale aye hu myoyo j'abaatu.*

4 Ehyo kiroma olw'obwesige obuhuli ni nawo mu Hatonda ni hubita mu Kurisito.

5 Sihuloma huuti ndiife abamanyi aye obumanyi weefe buṅwa yiri Hatonda.

6 Era nj'owatufuula abajeeresa ab'endagaano yiye epyaha abatali ṅaasi w'amagambi aga baṅa Musa aye ab'Omwoyo Omutukuvu. Hiri hiityo olwohuba amagambi galeetera abaatu ohubasalira ogw'ohufa aye Omwoyo wa Hatonda agima baaba n'obulamu.*

* **3:3 3:3** Huj 24:12; Yer 31:33; Ezek 11:19; 36:26

* **3:6 3:6** Yer 31:31

7 Obanga amagambi agaleetera abaatu ohubasalira ogw'ohufu gaaja n'ejono ery'amaani era hyaleetera Abayisirayiri ohutasobola huheja Musa mu moni ate nga ejono eryo lyali lyahaseera buseera,*

8 olwo obunjeeresa bw'Omwoyo Omutukuvu sibuhiraho aho ejono?

9 Obanga amagambi agaleetera abaatu ohubasalira ogw'ohufa gaaja n'ejono, olwo obunjeeresa obuleetera abaatu ohuba bagwalaafu sibulihiraho aho ejono?

10 Olw'ehyo ehyo ehi baatu bananga ejono eryo ery'amaani sihihiri n'ejono olwohuba hira hira n'ejono ohuhihira.

11 Naahani obanga ehyo ehy'ehiseera buseera hyaja n'ejono, olwo hira ehy'oluberera sihirihiraho aho ejono?

12 Olw'ehyo, ng'olu huli n'esuubi eryo, husigala ni huli bagumu.

13 Sihuli hya Musa owewihiriranga olugoye Abayisirayiri batabona humeregenya hwomu moni wuwe ni humunwaho.*

14 Cooka n'ohwola olwa leero luno nibo bahisirinjaliye ohwo olwohuba ni basoma amagambi aga bana Musa, basigala ni bafaania olwohuba Kurisito nj'eyene awihula abaatu emoni ko bafaania.

15 N'ohwola olwa leero luno ni basoma amagambi aga bana Musa, sibagategeera olwohuba ehyabawiiha emyoyo jaawe hihiiri hubawijuhaho.

* 3:7 3:7 Hunj 34:29 * 3:13 3:13 Hunj 34:29

16 Aye hiisi ocuuha gafugiirira Musengwa, amuwihula emoni ko gafaania ehituufu.*

17 Musengwa Mwoyo era Omwoyo wa Musengwa aya aba, aleeta edembe.

18 Naahani balabe, efe hwesihwesi aba Musengwa gawihula emoni hwafaania, huli n'ohulaga enono lirye era habuhyabuhyu hucuusiwenga ohumufaanana olw'enono eryo erija eyi huli mu maani g'Omwoyo Omutukuvu.

4

Embya ej'eroba ejibabiihamo eby'obuninda

1 Hatonda nj'owatulanga olw'ehisa hihye gaatunja obunjeeresa buno. Olw'ehyo, sihunanga hunjwamo maani ohuhola omulimo guno.

2 Hwasalano ohutahola ebiitu eby'elsoni ebi baatu bahola mu ngiso era sihutambisa bubi ehibono hya Hatonda olw'ohweyendulira ebyefe. Wabula hulomera abaatu amazima mu moni ja Hatonda era hiisi muutu amanyire hiina ehi huli.

3 Ne ni hiba ti Amanjuro Amalaji aga hubulira sigategereheha, sigategereheha eyiri abo abatiina mu husihiiraha.

4 Sigategereheha eyi bali olwohuba Sitaani gabasirijasa, gabawiha emoni ohutabona enjase ey'Amanjuro Amalaji aganjamba hu enono lya Kurisito owaleha ehi Hatonda ali.

5 Hiri hiityo olwohuba sihubuulira ebitunambaho aye hubuulira ebinjamba hu

* 3:16 3:16 Hunj 34:29

nje Yesu Kurisito nga Musengwa n’ohweromaho huuti huli bajeeresa benywe hu lulwe.

⁶ Hino huhihola olwohuba Hatonda owaloma ati, “Leha nabejo enjase yaaduhe mu hiirema,”* galagira enjase ohwaduha mu myoyo jeefe husobole ohutegeera huuti enono lirye libonehera mu Kurisito.

⁷ Aye ehy’obuninda ehyo hiri mu ndiife ohuli hy’embya ej’eroba. Ehyo hiri hiityo olw’ohwenda ohulaga ti Hatonda nj’omwene bunangi sosi efe.

⁸ Hwosa ehiseera, ebigosi byatunyigirisa eyi ni neeyi aye sibituhenamo maani. Era wayire ebiitu bituheehera, sihunwamo suubi.

⁹ Batuhiyaania aye Hatonda satulehurira, batunyigirisa aye sibatusihiirisa.

¹⁰ Hiisi aña huja, hugenda olumbe olweta Yesu ni lutulengereeye, obulamu wuwe bubonehere mu mibiri jeefe.

¹¹ Hiri hiityo olwohuba wayire huli balamu hiisi ludaalo hubita mu meeno ga nasaña hulwa Yesu obulamu wuwe bubonehere mu mibiri jeefe ejifa.

¹² Olw’ehyo, efe ohufa hutulengereeye, ko enywe musobole ohusuna obulamu obutanwano.

¹³ Baloma mu Byanandiihiwa baati, “Nafugirira, olw’ehyo naloma.”* Hwesi mu engeri nj’enyene ohufugiirira hwefe nj’ohugima hwaloma,

* 4:6 4:6 Tand 1:3 * 4:13 4:13 Zab 116:10

¹⁴ olwohuba humanyire huuti Hatonda owalamusa Yesu Musengwa, hwesi aja hutulamusa ng'olu gamulamusa era alitwanjulayo efe ni nenywe mu moni ja Hatonda.

¹⁵ Ale ni muhimanye muuti ndinywe omugima ni hubonaabona, ko ehisa hya Hatonda hyeyongere ohusasaana mu baatu, boosi beyongere ohumwebasa n'ohumuṅa eṅono.

Ebiṅeego hubitenga hu biitu ebitaboneha

¹⁶ Olw'ehyo, wayire emibiri jeefe jitiina ni jisesenṅa, sihuṅwamo maani, olwohuba habuhyabuhya obulamu weefe ow'omwoyo Hatonda abugobosa bunyaaha.

¹⁷ Sihunṅwamo maani olwohuba ebiguudyo ebi huli hubitamo bidiidiri era by'ehiseera buseera, sibyolana n'eṅono eritanṅaṅo erihulisuna olw'ohubigumira.

¹⁸ Olw'ehyo ebiṅeego byefe hubitenga hu biitu ebitaboneha sosi ebiboneha. Hiri hityo olwohuba ebiitu ebi hubonaho n'emoni jeefe by'ehiseera buseera aye ebyo ebitaboneha byahubaṅo emirembe n'emirembe.

5

Amago geefe gali mwigulu

¹ Humanyire huuti emibiri jeefe ej'ohuhyalo jiri hy'eweema eyi batanṅo bahena batusanṅo. Era ni hulifa, Hatonda alitunṅa emibiri ejindi mwigulu ejo ni jiri hy'enyumba ey'oluberera etanṅaṅo, eyi Hatonda omwene alitongola sosi abaatu.

² Ne ni huhiiiri mu mubiri guno hwesunga era hujemba ohwambala emibiri ejomwigulu,

³ olwohuba singa Hatonda atwambasa emibiri ejo sibaja hutwagaana ni huli wereere.

⁴ Hiri hiityo olwohuba ni huhiiiri mu mubiri guno, hubinda olw'obulumu olwohuba sihwenda batwambule aye batwambase ehyambalo ehyo ehyomwigulu; omubiri ogwo ogutafa gumire guno ogufa.

⁵ Ehyo Hatonda omwene gahena ohuhitegeha era gatuja Omwoyo Omutukuvu ohuba ahabonero eyi huli ohuhahasa ati ehyo hiribaŋo.

⁶ Olw'ehyo, ehituja obugumu habuhyabuhyu hiri ti humanyire huuti ni huhiiiri mu mubiri guno sihuŋanga huba yingo eyiri Musengwa.

⁷ Era hu hyalo huno hubaaho ni hwesiga Hatonda olw'ebiitu ebi gatusuubisa, wayire sihubibona n'emoni.

⁸ Olw'ehyo huli bagumu ne ehilwahasingire ohwenda nj'ohuŋwa mu mubiri guno hutiine hube ni Musengwa.

⁹ Kale hwefaaho ohusangaasa Musengwa hahibe ti huhiiiri mu mubiri guno oba hutiinire eyo eyi husuubira ohutiina.

¹⁰ Hiri hiityo olwohuba hwesihwesi hwenda sihwenda hulyemeerera mu moni ja Kurisito ohutusalira omusango ko hiisi muutu asune ehimusaanira olw'ebiitu ebiraŋi oba ebibi ebi ahola n'ahiiri mu mubiri guno.

Kurisito nj'atufaanjania ni Hatonda

¹¹ Olw'ehyo, ng'olu humanyire huuti hyetagisa ohuŋa Musengwa eŋono, huhubirisa abaatu

bebbwage. Hatonda atumanyire bulani era suubira ti mwesi mu myoyo jenywe mumanyire ehi huli.

¹² Ne sihuli hugesyaho hweromaho nindi eyi muli aye hwenda mube nehimwemaho ko mwepaaha hu lwefe era mube n'ehyohulomera abo abepaaha olw'ebiiitu eby'ohumugulu mu hifo hy'ebyo ebyomu mwoyo.

¹³ Ni huba ni huli balalu ng'olu baloma, huli balalu olwa Hatonda. Ne ni huba ni hutali balalu, ehyo hiyeeda ndinywe.

¹⁴ Hiri hiityo olwohuba ohwenda ohu Kurisito atwendamo nj'ohutuŋuga era hwehahasa huuti ye omulala hu wuwe gafa hu lw'abaatu bosibosi era olw'ehyo bosibosi nga baba oti abafuuye.

¹⁵ Era olw'ohufa huhwe hulwa abaatu bosibosi, abo abalamu bali n'ohumanya baati sibalamu hu lwawe aye hu lw'oyo owabafiririra gahena galamuha.

¹⁶ Olw'ehyo, sihuhitambisa magesi ag'obuutu ohutegeera ebifa hu muutu, wayire nga hwatambisanga amagesi g'obuutu ohumanya ehi Kurisito ali. Naahani humutegeera mu engeri eyindi.

¹⁷ Olw'ehyo, singa omuutu yesiyesi aba mu Kurisito aba afuuhire hitonde hinyaaha, ebihale biba biŋooyeŋo n'afuhiire muutu munyaha.

¹⁸ Ebyo byosibyosi Hatonda owafaana ni neefe n'abita mu Kurisito nj'abihola. Era gahena gatuna obunjeera ow'ohuhubirisa abaatu abandi boosi bafaana ni naye.

¹⁹ Ehiri ti Hatonda afaana n'abaatu bosibosi n'abita mu Kurisito, anauma hubabalira ebibi

byawe. Era gaatuṅa obunjeeresa ow'ohulomera abaatu obuhwenda obunamba hu hufaanana ohwo.

²⁰ Olw'ehyo huli bahwenda ba Kurisito era Hatonda abahubbira omulanga n'abita mu hubulira hwefe. Hubegayirira mu esiina lya Kurisito mufaanane ni Hatonda.

²¹ Hatonda ganayo Kurisito ate nga sigaholaho hibi hyosihyosi ohuba enjongo olw'ebibi byefe. Era olw'ehyo hunaba bulala ni naye Hatonda atubala ohuba bagwalaafu.

6

¹ Naahani ng'olu Hatonda gatuna ohuba abatambi ni naye, hubegayirira ohutatambisa bubi ehisasabirisi ehi gabaṅa.

² Hatonda aloma ati,
 “Mu hiseera hyange ehituufu
 nabagobolamo,
 era hu ludaalo olw'ohunonoha
 nabayeeda.”*

Era mbalomera ti hino nj'ehiseera hya Hatonda era olwa leero nj'oludaalo olw'ohunonoha.

Ebigosi ebi Pawulo gaasuna

³ Sihwahendire hwesitaaza muutu yesiyesi mu bihuhola ko batanaha obunjeeresa weefe esiro.

⁴ Aye mu hiisi hiitu hulaga huuti huli banjeeresa ba Hatonda. Olw'ehyo hwehaliiriha bugali ebigosi omuli embeera embi,

⁵ ebihubbe, ohutubonja mu komera, abaatu ohutuyabuluhiraho, ohutamba emirimo

* 6:2 6:2 Yis 49:8

ej'amaani, ohutalimba hwiwo n'ohuhaya ehyohulya.*

⁶ Era hulagire huuti huli baneeresa ba Hatonda mu nebisya yeefe, mu hulaga huuti hutegeera Hatonda, mu hugumikiriza n'ohuba ab'ehyere, n'omuhuboneha ti amaani g'Omwoyo Omutukuvu gaholera mu fe era ti ohwenda hwefe hubulamo hwehubbira.

⁷ Ni hwongera hu ebyo, hulomera abaatu Amanuliro Amalanyi mu maani ga Hatonda. Era hutambisa obugwalaafu ng'ehisoosa mu muhono gwefe omulungi n'omugooda.

⁸ Nalino abatuja enono abandi batujerega, abatulomaho ebirani abandi ebibi, abatulanga baati huli baneeresa abatuufu abandi baati huli badulingi.

⁹ Batujira hy'abaatu aba batamanyire ate nga batamanyire. Batubalira mu bafu aye huli balamu era batugudya baatwite aye sihufa.

¹⁰ Wayire batunakujasa, husigala ni huli basangaafu. Wayire huboneha hy'abagadi, huleetera bangi ohuba banjinda. Wayire huboneha oti hunuma hiitu hyosihyosi, huli ni hiisi hiitu.

¹¹ Enywe abaatu b'e Koriiso, efe hiisi hiitu huhiromire mu lwatu eyi muli ni njajuma ehihubagisa.

¹² Efe hubalagire huuti mutuli hu mwoyo aye enywe mutulagire muuti hubali njaleeni mu bineego byenywe.

¹³ Mbasunga ng'olu nahasungire abaana bange, mwesi mutulage muuti hubali hu mwoyo

* 6:5 6:5 Bik 16:23

jenywe.

Mutaholanga muhumba n'abatafugiirira Kurisito

¹⁴ Mutaholanga muhumba n'abatafugiirira Kurisito. Hiri hiityo olwohuba n'ajuma ehinanga ohunimba abaatu abahola ebirujamu n'abahosi b'ebibi. Oba kolagana hi enanga ohubano ngati w'enjase n'ehiirema?

¹⁵ Kolagana hi erino ngati wa Kurisito ni Sitaani? Hiina ehinimba omuutu afugiirira Kurisito n'atamufugiirira?

¹⁶ Era kolagana hiina erino ngati wa Yekaalu ya Hatonda n'eyebitali Hatonda? Huli Yekaalu ya Hatonda Omwene Bulamu. Era Hatonda galoma ati, "Naabenga mu bo era nagendenga ni nabo. Nja huba Hatonda waawe, boosi banaabenga baatu bange."*

¹⁷ Era Musengwa aloma ati,
"Olw'ehyo, mubanjwemo,
mubeyabuleho.

Mutanjambanga hu hiitu ehitali hitukuvu,
keesi nja hubasangaalira."*

¹⁸ "Nja huba Semwana
era mwesi muja huba baana bange.

Ese Musengwa Omwene Bunangi, ndiise
aloma."*

* **6:15 6:15** Mu bitabo ebindi bamulanga baati Bbeliya. * **6:16 6:16** Leev 26:12; Ezek 37:27; 1 Kor 3:16; 6:19 * **6:17 6:17** Yis 52:11 * **6:18 6:18** 2 Sam 7:14; 1 Linjo 17:13; Yis 43:6; Yer 31:9

7

¹ Bameeri bange abahoda, ng'olu batusu-ubisa ebyo byosibyosi, hulongoose obulamu weefe hulehe ohuhola ebiitu ebyonoona emibiri n'emyoyo jeefe, ko husobole ohubeera erala abagwalaafu olw'ohutya Hatonda.

Esangaalo lya Pawulo

² Bahyange mubeho n'anamututa mu myoyo jenywe. Enjuma muutu oyu huholangaho ehibi oba oyu hulyakulangaho oba oyu hwebaho.

³ Sindoma hino hubasalira musango. Nahirumaho hale ti mutuli hu myoyo era huli njalala mu bulamu nomu hufa.

⁴ Mbesiga bugali era mbenyumirihisamo. Olw'ehyo wayire mbaaye n'ebigosi bingi aye sigaaye ni ndi musangaafu bugali.

⁵ Era ni hwola e Makedoniya, sihwusunaho bujeerero olwohuba batugudya mu hiisi ngeri era ehiseera c'ehyene ni hunjirinana n'abaatu ko n'obuti owaali mu myoyo jeefe.

⁶ Aye Hatonda agumya abo abanjoyemo amaani gatugumya n'abitira mu huuja hwa Tito n'anwa eyo.

⁷ Ohuuja huhwe sinje ohwatugumya hwojone aye hwasuna obugumu ni gatulomera ng'olu mwamusangaasa bugali. Tito gatulomera ng'olu munjemba ohumbonaho, ng'olu mwehubba mu hifuba olw'ebyo ebyaliyo era ng'olu mundumirwa bugali. Ebyo byosibyosi byeyongera ohusangaasa.

⁸ Wayire ebbaluja eyi nabanandiihira yabaletera ohunakujala, sinehebulisa lwahiina

nayinandiiha. Ne wayire noola ehiseera nehebulisa olwohuba yabanakunasa, ehyo hyali hya ahaseera buseera.

⁹ Cooka njaahani ndi musangaafu silwohuba ti nabanakunasa, olwohuba ohunakunala hwenywe hwabaleetera ohwehubba mu hifuba mwenenya. Hwali husiima hwa Hatonda enywe ohunakunala, olw'ehyo njanuma hibi ehi hwabahola.

¹⁰ Ohwehubba mu hifuba ohu Hatonda asiima hugima omuutu genenya hyamunweramo ohunonoha era omuutu oyo sigehebulisa. Aye ohwehubba mu hifuba ohwa hamooyo mooyo, hujwamo ohusihiiriha.

¹¹ Ale mubone ohwehubba mu hifuba ohusangaasa Hatonda ng'olu hwaleetera hiisi mulala hu enywe ohwenosyaho, obusungu ohubanamba olwa oyo owanwaho endibo n'ohutandiha ohuutya, ohujemba ohumbonaho. Era hyabaleetera ohwenda bamubonerese omuhosi w'ebibi. Mu ebyo byosibyosi mwalaga muuti njanuma ehy'ohuboloobya.

¹² Olw'ehyo sinanandiiha hu lw'omuutu owahola ehibi, oba olwa oyo oyu basobyaho aye nabanandiihira lw'ohwenda huhahasa mu moni ja Hatonda ti mutwenda.

¹³ Ebyo byosibyosi bitugobosamo amaani. Era ohumeeda hu ehyo, hwali basangaafu bugali olwohuba mwesimwesi mwaleetera Tito ohuba musangaafu.

¹⁴ Naali nenyumirihise eyiri Tito ng'olu muli balanji, hiranji ti simwaswasa. Aye ng'olu byosibyosi ebi hwabalomera byali bitu-

ufu, n’ohwenyumirisa hwefe eyiri Tito sihwali hwabudulingi.

¹⁵ Era Tito abenda bugali mwesimwesi ohuhirira erala nahebuulira engeri eyi mwamusangaaliramo, ng’olu mwamugondera ko n’erono eri mwamuja.

¹⁶ Ndi musangaafu olwohuba mu biitu byosi-byosi panga ohubesiga.

8

Ohugaba

¹ Aboluganda, ŋaahani hwenda mumanye hu biŋamba hu hyere ehi Hatonda gaŋa ebib-bubbu by’abafugiirira ebyomu twale ly’e Make-doniya.

² Wayire baali n’ebigosi eby’amaani era ni bali bagadi bugali, basigala ni bali basangaafu era ehyo hyabaleetera ohugaba n’omwoyo mulala.

³ Mbalomera ehituufu ti bagaba n’ohusingisaho ng’olu baali ni basobola. Era ehyo bahihola hulwa ohwenda hwawe abeene.

⁴ Batwegayirira bugali hubafugiirire ohusoloohesa abaatu ba Hatonda abali mu Yerusaaumu obuyeedi.

⁵ Baahola ehi hwali ni huṭabasuubiriramo! Beheerera hwenayo eyiri Musengwa, ng’oluvanyuma batweŋa hwesi olw’ohusiima hwa Hatonda.

⁶ Olw’ehyo hwahubbirisa Tito ohutiina mu moni n’omulimo ogw’ohubasoloosamo obuyeedi, mu ngeri eyi gaali n’agutagihireho.

⁷ Aye ng’olu muli ndinywe abasinga abahyenywe mu hiisi hiitu; mu hufugiirira, mu

hubuulira, mu humanya ebiŋamba hu Hatonda, mu huba abaheneerefu era nomu hutwenda, hwenda mube c'ehyene nomu hugaba.

⁸ Sindi hubalagira aye nenda hubona obuhenerefu bw'ohwenda hwenywe ni ngeragerania n'ohwenŋaayo hw'abaatu abandi.

⁹ Mumanyire ehyere ehi Musengwa weefe Yesu Kurisito ali ni nahyo. Wayire gaali muŋinda ne gafuuha mugadi hu lw'ohwenda mufuuhe baŋinda hu lw'obugadi wuwe.

¹⁰ Ese, hino nj'ehiŋeego hyange hu biŋamba hu husoloosa obuyeedi. Omwaha ogubitire ndinywe omweheerera simu husoloosa hyoŋene aye nomuhuba baheneerefu ohuhihola.

¹¹ Olw'ehyo muheneerese omulimo ogu mwatagiha era obuheneerefu obu mwali ni nawo butiinire ŋalala n'ohuhita mu kola ni mwema hu pamba yenywe.

¹² Hiri hiityo olwohuba omuutu anagaba n'obuheneerefu era gaŋayo ni geema hu ebi ali ni nabyo Hatonda amusiima era samubalira hugaba ebi aŋuma.

¹³ Sinenda hubahalubya, abandi ni beyagala aye nenda ŋabeŋo ohuŋeraŋerana.

¹⁴ Mu hiseera hino muli n'ebingi, olw'ehyo hiraŋi muyeede abo abaŋuma. Era mwesi ni munahabe ni muŋuma nibo ni bali ni nabyo, banahabayeede. Mu ngeri eyo ŋanahabe ŋaliŋo ohuŋeraŋerana.

¹⁵ Ng'olu hyaŋandiihiwa hiiti, "Oyo owahumbaanianga ebingi, sigaali n'ebingi era

ni nooyo owahumbaanianga ebitotono, sigali n'ebitotono.”*

Batuma Tito ohutiina e Koriiso

¹⁶ Neyaasa Hatonda owanja Tito omwoyo ogubalumirwa hy'ese.

¹⁷ Sigahoma hu hufugiirira ehi hwamuloma ohuhola hyonene aye yeesi omwene gaali muheneerefu ohuuja eyi muli abayeede.

¹⁸ Era huli humutuma n'omulebe oyu ebibbubbu by'abafugiirira ebyeno byosibyosi biŋa eŋono olw'ohulomera abaatu Amanŋuliro Amalanji.

¹⁹ Era n'ehindi, ebibbubbu by'abafugiirira Kurisito byamwangala atunjererehere ni hunjira obuyeedi, olw'obunjeresa buno obu huhola ohunja Hatonda eŋono n'ohulaga ng'olu huli baheneerefu ohuyeeda.

²⁰ Hwenda hwegenderese natabanjo hwemulugunya hu engeri eyi husoloosamo n'eyi hugabamo obuyeedi obubitiirifu hy'obwo.

²¹ Ehigendererwa hyefe huhola ebirunamu, simu moni ja Hatonda yenene aye nomu moni j'abaatu boosi.*

²² Olw'ehyo huli hubanindihira omulebe owundi nalala ni nabo. Mirundi mingi, huweene omulebe oyo n'alaga ati munyikifu mu hwenda ohuyeeda abahye. Era nahanani geyongeeye ohunyikira olwohuba abalimo esuubi ebbala eryohugaba ni muteemota.

²³ Tito niye mumumanyire muuti mutambi wahyange oyu kola ni naye olw'ohubagasa.

* 8:15 8:15 Hunj 16:18 * 8:21 8:21 Nge 3:4

Abalebe aba ali ni nabo, bahwenda ohuŋwa mu bibbubbu by'abafugiirira ebyeno, abajeesa Kurisito eŋono.

²⁴ Olw'ehyo mulage abasaaja abo obuhahafu w'ohwenda hwenywe ko ebibbubbu by'abafugiirira byosibyosi bihahase era bimanye biiti ebi hubenyumirihisamo, bituufu.

9

Ohuyeeda abafugiirira Kurisito

¹ Sihinjetagisa hubaŋandiihira hu biŋamba hu buyeedi owohuŋirira abafugiirira Kurisito abali mu Yerusaalemu.

² Hiri hiityo olwohuba manyire ti muli ba-heneerefu ohuyeeda era mbayenga mbapaaha eyiri abaatu b'e Makedoniya ti ohuŋwa omwaha ogwo, abalebe abomu twale ly'Akaya bahe-neerefu ohusoloosa obuyeedi. Era obuheneerefu wenywe buleeteeye bangi ehinyeegenyege boosi ohwenda ohuŋaayo obuyeedi.

³ Aye ndihuŋindiha abalebe abo ko ohupaaha ohunabapaaha hutaba hwawereere aye mube betegefu ng'olu naloma ti muli betegefu.

⁴ Hiri hiityo olwohuba singa niija n'abalala hu baatu b'e Makedoniya, hwagaana ni mutetege-hire, ehyo hija hutuleetera si efe hwenene aye ni nenywe mwesi ohuswala olwohuba naali kenire ohubapaaha.

⁵ Olw'ehyo mbona ti hiraŋi ohubasindihira abalebe beheerere ohubahyalira, babayeede ohuheneresa etegeha ey'ohusoloosa obuyeedi

obu mwasuubisa. Ehyo ko hirage hiiti mwanayo muhweyendera, anajuma hubanjirisa.

⁶ Muhebulire muuti oyo amwa anatono, aligesa bitotono era ni nooyo amwa anabbala, aligesa bingi.

⁷ Olw'ehyo hiisi muutu agabenga ng'olu aba n'asalireno mu mwoyo gugwe, sosi muhwenagia oba olw'ohumunia. Hiri hiityo olwohuba Hatonda genda omuutu agaba n'esangaalo.

⁸ Era Hatonda ananga ohubana n'ebisingaho ebi mwetaaga, ko musobole hiisi hiseera ohuba n'ebibahena era musobole ohutambisa ebisigalaho ohuyeeda abali muwetaavu.

⁹ Era Ebyanjandihwa biroma biiti,
 "Gagabira abagadi n'ehyere,
 era balihebulira ehyere hihye
 emirembe n'emirembe."*

¹⁰ Era Hatonda aja omulimi owumo owohumwa n'emere ey'ohulya, aja hwasawumo wenywe mwaheyongera ohuyeeda abo abajuma.

¹¹ Hatonda aja hweyongera ohwasawo hiisi ehi muli ni nahyo ko musobole ohuna obuyeedi abajuma era obuyeedi owo ni bubita mu efe ohwola eyiri abo abawetaaga ko abaatu abo beyaasenga Hatonda olw'ebyo ebi muholire.

¹² Ehyo kiroma olwohuba obuyeedi wenywe sibuhoma hu huleetera abaatu ba Hatonda ohusuna ebi bajuma hyonene aye higima baatu beyaasa Hatonda bugali.

¹³ Ni balibona ehyere hyenywe eyi bali ko n'eyiri abaatu abandi, baja hujumirya Hatonda

* 9:9 9:9 Zab 112:9

olwohuba muliba mulagire ng'olu mugondera ebiragiro bibye era ti mu butuufu oweene mwafugiirira Amanjuliro Amalangi aga Kurisito.

¹⁴ Era muja huba bahoda eyi bali era babasabirenga ekabi ohunwa eyiri Hatonda olw'ehyere ehy'amaani ehi gabaŋa.

¹⁵ Era hweyaasa Hatonda olw'ehirabo hihye ehyo ehyenunjisa.

10

Omuhwenda wa Kurisito

¹ Ese Pawulo oyu abandi munywe baloma baati mbo ndi muti era baati mbo nimba ni nenywe tya ohubahayula aye aŋa mubula nga ko nehambunasa mu bbaluŋa, hambalombe ni mbegayirira olw'ehisa n'ohwenomeha hwa Kurisito.

² Mbasunga mutandeetera huba n'ehabyo ni nijire eyo, olwohuba eyo, eriyo abaloma baati huli baatu buutu hya nibo era hwesi hwebisya ng'olu baatu abandi mu hyalo hino bebisya. Olw'ehyo suubira ohuba n'obusambuha eyi bali.

³ Hiri hiityo olwohuba, wayire hwesi huli baatu buutu ng'olu baloma, efe sihusoola mu ngeri eyi baatu buutu basoolamo.

⁴ Ebisoosa ebyefe sibya mu hyalo hino aye biŋwa eyiri Hatonda era biri n'amaani ohusihi-irisa amaani g'omusigu.

⁵ Husimya ebibono byosibyosi ebireetera abaatu ohutamanya Hatonda. Era hucuusa epeega yaawe baba ti bagondera Kurisito.

⁶ Ni munahafuuhire erala abagondi eyiri Kurisito, huja hugudya hiisi muutu omujeemu.

7 Mulengerere esonga era mufaanie ehituufu. Oyo owenjeegaho ati nje yenene anjeeresa Kurisito, ali n’ohuhimanya ati hwesi huli bajeeresa ba Kurisito abatuufu.

8 Wayire nepaaha olw’obunangi obu Musengwa gaatuja, ehyo sihipambya soni olwohuba Kurisito gaabutuja ko husobole ohubagumya mu hufugiirira sosi ohubahenamo amaani.

9 Sinahendire huboneha oti mbatihirisa n’ebi pandiirira mu bbaluwa jange.

10 Hiri hiityo olwohuba abaatu abandi baloma mbo, “Ebbaluwa ja Pawulo kambwe era j’amaani aye omwene munafu n’ali ni neefe era ebi aloma adafaaya hudafaaya.”

11 Aye abaloma baaty, bali n’ohumanya baati ebi huloma mu bbaluwa jeefe, mbebi hulihola ni hujire eyo.

12 Efe sihweta hu daala erala oba ohwegeragerania hu abo abeginiha. Abeene beeterano esambo eji bajeega baati tuufu era bajifuula ehipimo ehy’ohwegerageranihisyo abeene hu beene. Ehyo hiraga busiru.

13 Ne efe sihuja hwepaaha ohuhiraho ng’olu hisaana, ohutusaho huja hwepaaha hu binamba hu mulimo ogu Hatonda gatunambya era mwesi omulimo ogwo gubahooheramo.

14 Hwahali hutuumire esalo ohwepaaha hu lwenywe mubanga ni mutali balala hu abo aba Hatonda gatunambya ohulomera Amanuliro Amalanji aganjamba hu Kurisito.

15 Ate era sihwepaaha hulwa ebi bandi bahola ebulafu w’esalo j’omulimo ogu

Hatonda gatunjambya.* Husuubira huuti muja hunangala mu hufugiirira hwenywe era n'omulimo gwefe mu enywe gweyongere ohugalama.

¹⁶ Ehyo hyahatuleetera ohubuulira Amanuliro Amalanji mu bitundu ebindi olwohuba efe sihwepaaha olw'omulimo ugu bandi baahola.

¹⁷ Aye hyanandiihiwa hiiti, "Oyo owepaaha, gepaahenga olwa Musengwa."*

¹⁸ Hiri hiityo olwohuba omuutu oweginiha, sinje oyu Musengwa asiima aye asiima nj'oyo oyu omwene aginiha.

11

Pawulo n'aberanga abahwenda

¹ Nahabasungire mwehaliriheho obusirusiru wange. Era peega ti muli huhihola.

² Mbabubira era ewuba erindi ni nalyo lijwa yiri Hatonda, olwohuba nabahobya nabaleeta eyiri Kurisito mube babe yenene, mbaneyo eyi ali ni muli bagwalaafu hy'omuhaana atanenyuhangaho n'omusinde.

³ Aye ndimo ohutya ti ng'olu etemu yadulinga Kaawa, mwesi munangire ohubbaama mwanjwa hu mazima ga Kurisito.*

⁴ Hiri hiityo olwohuba muli bangu b'ohufugiirira omuutu singa gaaja gabuulira

* **10:15 10:15** Oba: Sihuja hwepaaha olw'ehiitu ehi otananga hupima aye huja hwepaaha ni hwema hu hipimo ehi Hatonda omwene hipimo gatutuma ohuhola, nga mwesi pomu muli. Era sihwepaaha olw'ehiitu ehi bandi baahola. * **10:17 10:17** Yer

9:24 * **11:3 11:3** Tand 3:1-5,13

ebinjamba hu Yesu owundi, otali oyo oyu hwabuulira oba mwafugiirira omwoyo owundi atali oyo oyu mwasuna oba mwafugiirira Amanuliro agandi agatali ago aga hwabalomera.

⁵ Aye sipeega ti abo abeeranga abahwenda abahihenaho bali n'ehibaakira.

⁶ Pangire ohuba ni taali mulomilomi mulani, ne abo sibaakira humanya amazima era mu hiisi ngeri ehyo hwahibahahasa bulani.

⁷ Ni nababuulira Amanuliro Amalani ohunwa eyiri Hatonda, sinabasasulisa. Olwo ko muneeega muuti obuhwenda obu nabalomera waali bunjumamo samuuna? Oba nahola hibi ohweyisa tyo?

⁸ Ni naali eyo ni mbaholamo omulimo, nali hy'onyaga ebibbubbu by'abafugiirira Kurisito ebindi, olwohuba mbebi nasunangamo obuyeedi mu hifo hy'ohubusuna mu enywe.

⁹ Era ni naali eyo, ni nabananga ehi nenda, nanumanga wayire mulala hu enywe oyu nasitonjereranga olwohuba abalebe ab'e Makedoniya bandeeteranga obuyeedi. Nehuumanga ohutaba n'engeri yosiyosi ey'ohusitonolera muutu yesiyesi era nja hweyongera ohutabasitonjerera.

¹⁰ Mu hino nanuma muutu yesiyesi mu twale ly'Akaya aja hundobera ohwepaaha olwohuba nanuma ehi ndicusamo ohufugiirira obuyeedi ohunwa eyi muli. Era ehi ndoma nj'amazima mu siina lya Kurisito ali mu bulamu wange.

¹¹ Mutaneega muuti hino kiroma olwohuba simbenda. Mu butuufu ni Hatonda yeesi amanyire ati mbenda.

12 Wabula nja hutiina mu moni n’ohutanaana obuyeedi wenywe olw’ohwenda ohusimya abo aberanga abahwenda bataba n’ehi bemaho ohwepaaha n’ohutwegerageraniaho.

13 Abaatu abo abeeranga abahwenda bakuyakuyi era mu bukuyakuyi waawe beranga ohuba bahwenda ba Kurisito.

14 Era ehyo sihyenunjisa, olwohuba ni Sitaani yeesi gefuula ohuba malayika ow’enjase.

15 Mu ngeri nj’enyene sihyenunjisa abanjeeresa babe ohwefuula ohuba abanjeeresa abahola ebirunamu. Ne hu komerero baja husuna ehibonereso ehisaana ebikolwa byawe.

Ohubonaabona hwa Pawulo ng’omuhwenda

16 Ng’olu kenire ohuhiroma nindi hambagoboleremo: Mutanjeega muuti ndi musiru. Aye ni muba ni munjeega muutyo, kale mupire hy’omusiru keesi nepaaheho.

17 Ohwepaaha hwange huno, sihunwa yiwa Musengwa aye kihola ng’omusiru.

18 Ng’olu bangi bepaaha olw’ebibaholire, keesi hanepaaheho.

19 Olwohuba muli bagesi ehihena nj’ehigima ni mwehaliriha ebibono by’abasiru abo?

20 Dala ndimufayo omuutu ohubafuula abeedu babe oba ohubanyaga, oba ohubacuuhisa n’ano ni nanala, oba ohubeeba lubona?

21 Kale handome ti swaye olwohuba sihwananga hubahola hy’abo. Aye nanabaŋo owepaaha mu hiitu hyosihyosi, keesi nja hwepaaha era hino kiroma hy’omusiru.

²² Abepaaha abo sibaloma mbo Mubbebbulaniya? Keesi ndi Mwebbulaniya. Baloma baati mbo Bayisirayiri? Keesi ndi Muyisirayiri. Baloma baati mbo bejuhulu ba Yibbulayimu? Keesi ndi mwijuhulu wa Yibbulayimu.

²³ Kaho baloma baati mbo bajeeresa ba Kurisito? Oba ndi huloma hy'omulalu. Ese kolire emirimo ohubahira. Basidihire mu komera emirundi mingi ohubahira. Emirundi mingi batinire ni bakubba bugali ohubahira era punyire hu hufa emirundi mingi.

²⁴ Emirundi etaanu, Abayudaaya bakubba esimbo amahumi adatu namwenda.*

²⁵ Emirundi edatu ni batambisa oluga, lulala baakubba amabaale era emirundi edatu eryato omu naali ni gendera lyabwagiha nahena omuusi n'owiire mu nyanja njaagati.*

²⁶ Mu ngendo jange enyingi eji ngendire, ponire enjabi ohundya, abeebi, ebigosi ebi Bayudaaya bahyange ko n'Abatali Abayudaaya banjohiseho. Ponire ebigosi mu bibuga nomu byalo, mu nyanja ko n'abaatu aberanga mbo balebe mu Kurisito.

²⁷ Fululuhene ni fabina bugali ni kola omuusi n'owiire ohweyemeresano era ebiseera bingi ni talimba hwiwo. Enjala n'enduho birumire hu ese emirundi mingi. Embeho efuunire hu ese ni puma hyahwedanya hu magumba.

²⁸ Ebyo n'obitaaye hu tulo, hiisi ludaalo pulira ni nyigirisiwa n'omugugu ogw'ohulabirira ebibubbu by'abafugiirira Kurisito byosibyosi.

* **11:24 11:24** Mag 25:3 * **11:25 11:25** Bik 16:22; 14:19

29 Nj'ani anwamo amaani, ndi ndumwa? Nj'ani ahemewa gaagwa mu hibi, nasihinduma?

30 Nimba wa hwepaaha, nja hwepaaha olw'ebyo ebiraga obunafu wange.

31 Hatonda era Semwana wa Musengwa weefe Yesu Kurisito, oyu baatu bali n'ohuja enono emirembe n'emirembe, amanyire ati sindulinga.

32 Ni naali mu hibuga Damasiko, gavana oyu habaha Areete gatajo, galagira abasirikale babe ohuhuuma ehibuga ehyo butiribiri bapambe,

33 aye abahyange nga baata mu gunaaba nga banjihisa mu dinisa eryali mu hiteepe ehyali ni hyeswanigirisa ehibuga, nga punuha.*

12

Ohwolesewa hwa Pawulo

1 Naahani leha nindi nepaaha wayire nga njanuma ehi higasa. Leha mbalomere ebinamba hu hwolesewa nohu biitu ebi Musengwa weefe Yesu Kurisito gaakwehulira.

2 Emyaha ehumi neene ejibitireno, Hatonda gaanira mulala hu abafugiirira Kurisito, mwigulu eryohudatu. Era omuutu oyo mumanyire ne simanyire oba hyalino n'ahiiri mulamu oba hwali hwolesewa aye Hatonda omwene nj'amanyire.

3 Ese manyire ti omuutu oyo oba gaali ahiiri mulamu oba bbe, ehyo Hatonda omwene nj'amanyire,

4 ese ehi manyire hiri ti bamunjira mu hifo ehy'ohwesiima. Ni goola eyo, ganjulira ebibono

* **11:33 11:33** Bik 9:23-25

ebi muutu atasobola hunyonyola era anjuma lukusa ohubiroosa.

⁵ Kale nja hwepaaha olwebyola hu muutu oyo aye sinja hwepaaha olw'ebyo ebipambaho ohutusaho obunafu wange.

⁶ Ate nindi wayire saalano ohwepaaha, sihiba ni hiraga hiiti ndi musiru olwohuba gahali mazima. Aye sinabijemo olwohuba sinenda muutu yesiyesi ohumbona mu hifaananyi ehindi ohuhiraho eh'y'ebyo ebi kola oba ebi ndoma.

⁷ Aye Hatonda olw'ohwenda tehudumbasa olw'ebiiitu ebyenunjisa ebi nabona, gaasyoha olunwa mu mubiri lungudye. Olunwa olwo, nj'omuhwenda wa Sitaani.

⁸ Era efunda edatu negalihira Musengwa weefe gaponie obulumi owo.

⁹ Aye gangobolamo ati, "Ehisasabirisi hyange hihuhena olwohuba amaani gange gabonehera mu bunafu." Olw'ehyo nja hwepaaha olw'obunafu wange ko obunangi wa Kurisito bubonehere mu ese.

¹⁰ Ehyo c'ehigima hulwa Kurisito naaba musangaafu olw'obunafu wange, nolu abaatu banduha, nolu mba mu bigosi, nolu bakiyaania, nolu mbonaabona olwohuba nimba munafu anjo ko mba ndi w'amaani.

Obuuti obu Pawulo ali ni nawo olw'esambo j'Abakoriiso

¹¹ Fuuhire hy'omusirusiru aye ndinywe omundeteeye ohwebisya tyo. Mwahali musiima olwohuba abahwenda aberanga ab'amaani abo sibaakira wayire nga puma anja ndi.

12 Ni naali eyo, mu hugumikiriza ohw'amaani nahola obubenero owenjunjisa ko n'ebyamaliholiho ohubalaga ti ndi muhwenda omutuufu.

13 Ebibbubbu by'abafugiirira Kurisito ebindi bibahira mu ngeri hi? Ohutusaho ti nibo naba-sunganga obuyeedi aye enywe bbe. Musonije olw'ohubaleha ebulafu mwihyo.

14 Naahani netegehire ohubahyalira omulundi ogwohudatu, cooka era sinja hubasitonjerera. Hiri hiityo olwohuba simbendaho byenywe aye nenda myoyo jenywe. Muhimanyire bulaji muuti muli baana bange. Ne abaana sinje ababiihiraho abasaaye baawe aye abasaaye nj'abalabirira abaana baawe.

15 Nja huba musangaafu ohuṅaayo ebyange byosibyosi era keesi neneereyo erala hu lwenywe. Wayire nga mbenda bugali, enywe munyenda hamooyomooyo.

16 Muhimanyire muuti sinabasitonjerera aye abandi hu enywe baneega baati mbo ndi mukuyakuyi era nabadulinganga.

17 Ne ehyo nahiholanga mu ngeri hi? Mu abo aba nabatumiranga, mulimo oyu n'atambisa ohubalyakula?

18 Nasunga Tito ohuuja eyi muli era gaaja n'omulebe owundi. Nalijo ehi Tito gabalyakula? Episa yange n'eyiye sinje enyene era sihuli n'ehigendererwa hirala?

19 Oba mujeega muuti huli hwenoomya hwenoomya mu moni jenywe? Efe, mu moni ja Hatonda huloma ng'olu Kurisito genda hulome era hiisi ehi huhola huhihola olw'ohubayeeda.

²⁰ Tya ohuuja eyo mbagaane ni mutali ng'olu nenda mube era mwesi mumbone ni tali mu hifaananyi ehi musuubiriramo. Tya ohuuja mbagaanemo obuyoga, egongi, obusungu, ohwesalasalamo obubbubbu, owiimi, ohujahana esiro, ohugeyana, ohwehudumbasa n'ohwetabujula.

²¹ Era tya ti ni nahaaje, esoni jiripamba mu moni ja Hatonda wange, ehyo hindetere ohulira amangi olw'abangi hu enywe, nanyuma ayo abaahola ebibi ndibebbwaga ebibi ebi bahola, omuli ohwejabaata n'obuhwedi n'ohuba n'emoni enyangu.

13

Ohulabula ohusembayo

¹ Guno guja huba mulundi gwohudatu ohuuja eyo ohubahyalira. Ehyandiihiwa hiroma hiiti "Hiisi songa bayihahasenga ni njalino obujulizi ow'abaatu babiri oba badatu."*

² Ni nabahyalira efunda eyohubiri nalabula abo abaahola ebibi ko ni naabo bosibosi abali hubbenga. Era wayire sindi ni nenywe, ngobolamo ohubalabula ti ni nahaaje, njajuma muutu abbenga oyu ndisasira.

³ Ehyo kiroma olwohuba mwenda ahabonero ahahahasa haati Kurisito aloma n'abita mu ese. Muhimanye muuti Kurisito simunafu aye ali n'amaani ag'ohubahangafula.

⁴ Wayire sigalaga ati w'amaani ni baali ni bamuhomerera hu musalabba aye olw'amaani

* 13:1 13:1 Mag 17:6; 19:15

ga Hatonda n̄aahani mulamu. Hwesi mu ye Hatonda atun̄a amaani ohubaholamo omulimu gugwe wayire abandi baloma mbo huli banafu mu malomere.

⁵ Hiisi muutu gehebere omwene abone hanye ahiiri mu hufugiirira. Simumanyire muuti Yesu Kurisito ali mu enywe? Ohutusaho nga mwenda hwendulinga!

⁶ Suubira ti muja huhifaania muuti efe ng'abahwenda abatuufu aba Kurisito, sibituhayanga.

⁷ Husaba Hatonda abayeede muleheṅo ohuhola ebibi, silwa hwenda huboneha oti hwabaholamo omulimo omulani aye enywe muhole ebirani, ng'olu hiboneha oti efe hwalemererwa.

⁸ Hiri hiityo olwohuba sihun̄anga huhola ehiitu ehiringirira Aman̄uliro Amal̄ani, ohutusaho ohubona huuti hugasoolerera.

⁹ Husangaala ni batubona baati huli banafu aye enywe ni muli bagumu mu hufugiirira. Olw'ehyo hubasabira mube badimamu.

¹⁰ Hino nj'ehigima ni mba ni tali ni nenywe mban̄andiihira ni mbaloma ebiitu bino, ko hibe ti ni nijire eyo taba w'ehabyo ni tambisa obuṅangi obu Musengwa gaapa ohubayeeda, sosi hubasihiirisa.

Obuheese

¹¹ Aboluganda, ni keneresa mweraba. Mufube ohuba badimamu mu hufugiirira, mute omwoyo hu bimbalomire, muholenga hirala, mumenye mu miyaaya n'abahyenywe era Hatonda atulaga

ohwenda era atunja emiyaaya, anaabenga ni nenywe.

¹² Hiisi muutu aheese owahye mu keesa ey'abaatu abagwalaafu.

¹³ Abafugiirira Kurisito abeenno bosibosi baba-hehiise.

¹⁴ Ehisasabirisi hya Musengwa Yesu Kurisito n'ohwenda hwa Hatonda, n'obulala ow'Omwoyo Omutukuvu, bibenga ni nenywe mwesimwesi.

**Endagaano Epyaha ko n'ebitabo ebindi
eby'Endagaano Ekayire mu Lunyole
Nyole: Endagaano Epyaha mu Lunyole (Bible)**

copyright © 2019 Wycliffe Bible Translators, Inc.

Language: (Nyole)

Contributor: Wycliffe Bible Translators, Inc.

This is the New Testament in Lunyole of Uganda, with 10 books from the Old Testament.

All rights reserved.

2025-05-17

PDF generated using Haiola and XeLaTeX on 17 May 2025 from source files dated 17 May 2025

e00787cd-838f-597a-9477-00b97e4e2cff